



5. marts 2010

UPA 2010/66

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiupparput:

Tunisassiassatut isumassarsiat aammalu inereerlugit avammut niooqqutissiassat Kalaallit Nunaanni pinngortinneqartut ingerlanneqartullu nunani tamalaani takoqqusaarutigineqartarnissaannut aningaasatigut tapersiisoqartalernissaa siunertaralugu takoqqusaaruteqartarnermut taperseeriaatsimik pilersitsisoqarnissaanik Naalakkersuisut sulissuteqarnissaat pillugu Inatsisartut aalajangiiffigisassaattut siunnersuut.

(ATASSUT-ip Inatsisartunut ilaasortaaitai: Finn Karlsen, Siverth K. Heilmann, Knud Kristiansen)

Tunngavilersuut:

Aaqqissuussinerit ullumikkut atuuttut, inuussutissarsiutinik pilersitsiniartut suliffeqarfittut taperneqarnissamut periarfissaat assigiinngitsut: tunisassiat ineriartortinneqarnissaannut aammalu suleqatissarsiorluni saqqummersitsinerni peqataanissamut taperseerineqarnissamut periarfissat suliffeqarfinnut pilersitsiniartunullu tapersersorneqarnissamut periarfissiineruvoq pitsaasoq.

Taamaattorli isumassarsisut/suliffeqarfiit nunat tamalaat akornanni ilisimaneqanngitsut tunisassianik nutaanik piareersimasuuteqartunut taamatut tapersersuisarneq naammanngilaq, unammillerneq annertoq akisooq aammalu sakkortoq tunisassiat ilisimaneqalernissaannut aqquasaagassaasarmat.

Takornarialerinerup siuarsaavigineqarnissaanut suliniuteqarneq annertoq kinguneqarsimavoq takoqqusaarnissamut tapersiisarnerup annertunerpaartaa takornarialerinerimik suliaqartunut sammitinneqalersimavoq, taakkulu nunatta avataani takoqqusaarnermik suliaqarnerannut taamatut tapersersueriaaseq immini ajunngitsuuvoq, taamaattorli aamma tunisassianik ineriartortitsisut takornarialerinerimillu suliaqanngitsut ilanngullugit tapersersorneqarnissaat pisariaqarpoq.

ATASSUT-mi isumarput naapertorlugu tunisassianik ineriartortitsisut takoqqusaarnissaannut toqqaannartumik taperseeriaatsimik pilersitsinissaq pisariaqarpoq, tunisassiammi annertuumik takoqqusaarutigineqarnissaat aalangiisuulluinnartuusarami tunisassiat iluatsittumik ingerlanneqarsinnaalernissaannut, taamaattorli aamma aallartitsiniartunut suliffeqarfinnullu pilerlaanut aningaasartormik annertuumik inornartumillu ingerlatsiffiusariaqartartoq.

Taperseeriaaseq matumani eqqartorneqartoq isumassarsisunut suliffeqarfinnullu tunisassianik nutaat pisiumasinnaasunut takoqqusaarunneqarnissaannut ajornaannerulersitsissaaq.

ATASSUT-mit qularutiginnilarput taamatut aqqissuussineq naggataatigut Kalaallit Nunaannut iluaqutaalluassasoq tunisassiammi iluatsinnerisigut aningaasanik nunatsinnut isaatitsinerulernmik kinguneqartussaammat.

Neriulluta siunnersuut Inatsisartunit ilassilluarneqassasoq taamatut tunngavilersuuteqarluta suliassanngortipparput.